



vischnaunca da  
**sumvitg**

# Ordinaziun sepultura e santeri

## **C u n t e g n**

---

Art. 1 Dretg surordinau	3
Art. 2 Pleivs	3
Art. 3 Incumbensas spezialas dallas pleivs	3
Art. 4 Register da fossas	3
Art. 5 Formaziun dallas fossas	3
Art. 6 Rumida dallas fossas suenter scadenza dil temps da ruaus	4
Art. 7 Indemnisaziun per cavar e cuvierer la fossa	4
Art. 8 Manteniment dil santeri	4
Art. 9 Persuna da contact	4
Art. 10 Approbaziun	5

Sebasond sil reglament sepultura e santeri dalla vischnaunca da Sumvitg relai la suprastanza communal la suandonta ordinaziun.

### **Art. 1 Dretg surordinau**

Las prescripziuns dil reglament sepultura e santeri ston vegnir risguardadas.

### **Art. 2 Pleivs**

Las pleivs da Sumvitg/Cumpadials, Rabius e Surrein san relaschar atgnas disposiziuns executivas che reglan l'organisaziun, las cumpetenzas ed il pensums dils funcziunaris che tangheschan igl intschesch da lur santeri. Determinaziuns digl uorden executiv dalla pleiv che cunterfan al reglament communal ein buca valeivlas.

### **Art. 3 Incumbensas spezialas dallas pleivs**

<sup>1</sup> Mintga pleiv ei responsabla pil menaschi, pil necessari uorden, per la survigilanza da sepultura e santeri sco era pil manteniment ordinari dil santeri tenor art. 20 dil reglament.

<sup>2</sup> Las pleivs elegian il personal per exequir las lavurs tenor alinea 1 e pigl ulteriur survetsch da santeri. Ellas fixeschan ils pensums dil personal enteifer lur disposiziuns executivas.

<sup>3</sup> L'indemnisaziun dil personal pil survetsch santeri ei caussa dallas pleivs.

### **Art. 4 Register da fossas**

<sup>1</sup> Sin fundament digl art. 11 reglament sepultura e santeri incarichescha la suprastanza communal las pleivs cun la controlla ed actualisaziun dil register da fossas.

<sup>2</sup> Quel secumpona d'in plan da santeri cun l'occupaziun dallas fossas e sto cuntener el minimum:

- a) num e prenum dil defunct
- b) onn da naschientscha e da mort dil defunct
- c) localisaziun dalla fossa

<sup>3</sup> La suprastanza communal decida davart controllas periodicas dil register da fossas ed informescha a dretg temps las pleivs.

### **Art. 5 Formaziun dallas fossas**

<sup>1</sup> La formaziun dallas fossas per mintga santeri sedrezza tenor art 13 dil reglament sepultura e santeri ed ei surschada allas pleivs. Ellas ein responsablas da tener bein a quen il plaz disponibel.

<sup>2</sup> Tier lubientschas spezialas da satrar concedidas dalla suprastanza communal conform agl art. 8 ein las pleivs autorizadas da decider schebein la bara sto vegnir cremada ni buc.

<sup>3</sup> En tals cass duei vegnir risguardau tenor pusseivladad il giavisch dil pertuccau resp. dalla parentella.

## **Art. 6 Rumida dallas fossas suenter scadenza dil temps da ruaus**

<sup>1</sup> Las pleivs ein autorisadas da decider en atgna cumpetenzza sur dalla rumida da singulas fossas u d'ina part dil santeri. Il necessari temps da ruaus da 20 onns ei da risguardar.

<sup>2</sup> Per revocaziuns extraordinarias da fossas sa la suprastonza communal disponer tenor art. 17 dil reglament sepultura e santeri.

## **Art. 7 Indemnisaziun per cavar e cuvierer la fossa**

<sup>1</sup> Las pleivs organiseschan sezzas il cavar e cuvierer la fossa el rom da lur incumbensas spezialas tenor questa ordinaziun.

<sup>2</sup> Anflan las pleivs denton negin personal per quest'incarica, procura la vischnaunca l'execuziun dallas lavurs.

<sup>3</sup> Ils cuosts per quella lavur vegnan adossai directamein als als vegnentsuenter dil defunct.

<sup>4</sup> L'indemnisaziun per cavar e cuvierer las fossas vegn fixada dalla suprastonza communal e communicada allas pleivs tier midadas ni adattaziuns. Ellas ein obligadas da suandar quella directiva.

## **Art. 8 Manteniment dil santeri<sup>1</sup>**

<sup>1</sup> Il manteniment ordinari tenor art. 20 al. 3 dil reglament sepultura e santeri cumpetta allas pleivs. *Mintga pleiv vegn indemnizada persuenter cun ina pauschala annuala da frs. 2'000.--.* Sco manteniment ordinari valan lavurs che serepetan periodicamein (sco p.ex. tener uorden, segar pustgets, dismissa da neiv *pil diever ordinari dil santeri sco era per sepulturas*, dismissa da curdems, chisar vias etc.) ed ein necessarias pil diever e maletg dil santeri.

<sup>2</sup> Sco manteniment extrodinari tenor art. 20 al. 4 dil reglament sepultura e santeri valan principalmein la construcziun ed il manteniment da mirs, seivs entuorn il santeri, furniziun da material per ulivar las fossas, sco era la rumida da neiv en cass da grondas nevadas, cun consentiment dil cau da ressort santeri.

<sup>3</sup> Manteniment extrodinari pigl onn proxim ei da comunicar alla suprastonza communal ni al cau da ressort santeri sil pli tard el settember digl onn current, sinaquei che l'executiva communal sappi risguardar quella fatschenta el rom dil preventiv.

## **Art. 9 Persuna da contact**

Sco persuna da contact denter las pleivs e la vischnaunca funcziuneschan il president sco representant dalla pleiv ed il cau dil ressort santeri sco representant dalla suprastonza communal.

---

<sup>1</sup> Revisiun parziala entras suprastonza communal dils 23-03-2010, prot. 06/2010

## **Art. 10 Approbaziun**

<sup>1</sup> Questa ordinaziun ei vegnida approvada dalla suprastanza communal ella seduta dils 22-01-2001 e passa en vigur cun l'approbaziun dil reglament da sepultura e santeri entras la radunonza communal dils 05-03-2001.

<sup>2</sup> L'emprema revisiun da quest'ordinaziun ei vegnida approvada dalla suprastanza communal ella seduta dils 23 da mars 2010 ed ei entrada immediat en vigur.

**Il president communal**

*sig. Walter Deplazes*

**Il canzlist communal**

*sig. Patrick Schaniel*